

Zwaai tur dede na bo bisiñanan y dia di Pan di maishi

Dialuna awor nos ta celebra **Dia di Himno y Bandera**. Nos tin un motibo husto pa celebra esaki, pero tin tambe dlanan di fiesta cu ta sali for di mente di hende y nan ta checuta esaki.

Sinembargo nos tur sa significacion di **Pasco di Nacimiento y Pasco grandi**, y **Aña Nobo**, ademá tin cantidad di dia di fiesta cu ta wordo celebra tur dia na mundo.

Entre nan **hopi celebracion nacional straño**. Tur esaki pa **come, bebe, balia** manera mester ta cu un celebracion grandi. Lo por puntra; **kico ta haci un dia di fiesta straño**? Dianan di fiesta cu ta popular no ta straño tambe? Tuma **Pasco di Resurreccion**.

Kico **conenchi y webonan di color** tin di haci cu **Resurreccion di Cristo** ta keda un **misterio** pa mi. Ta djis pa a haci e dia aki comercial tambe, locual nan a logra sigur pasobra hende ta cuminda pensa prome riba e conenchanan y buscamento di webo di color y **ta lubida significacion di e Dia**.

Ta un colega a bisami cu suegra di yiu muher di su ruman, **na mei ta bay Hong Kong** pa celebra **Festival di Chau Bunna Hong Kong**. Mi tabata sa di esey pasobra el a yega di splicami anteriormente caba. El a splicami cu esey ta un **celebracion anual di core cu spiritonan malo**, **riba di 8 dia di e di 4 luna di calender chines** (den mayoria di caso den luna di mei). E celebracion ta garantiza tambe **navegacion cu tur seguridad pa piscador nan riba lama grandi**. E celebracion gracioso ta cu ta decora un toren di mas o menos 60 pia halto --dilanti templo Pak Tai-- di ariba te abao, cu pasabocanan manera bolo, donuts etc. den paki of como un bala.


E hendenan ta haya señal y **tur ta core bay na e tore nan pa trata na recoge mas tanto pasaboca cu por** for di esaki. Nan ta kere cu **mas tanto pasa boca nan logra** di e toren, **mas tanto suerte nan lo tin** e aña nan dilanti. Mi a busca dato pa loco riba esaki y a bin topa cune y e tabata tin razon. Tabata na 1978 cu a pone fin na e celebracion aki dia cu un toren a basha abao y despues cu varios precaucion pa seguridad a tuma lugar, a dicidi di permiti e celebracion atrobe.

Dia 24 di juni, nos ta celebra "Dia di San Juan". Pero na **Peru** por ehemplo, riba e mes dia nan ta celebra e ceremonia **Inca na Cuzco** y for di rond mundo hendenan ta biaha pa **Cuzco** pa presencia e procesion. E joncuman cu suerte pa actua como e emperador ta wordo carga riba un trono di oro y hiba na fortaleza di **Sacsayhuaman** pa pidi bendicion di solo den e lenga original clasico di incanan, **Quecha**. Pa e incanan e **Dios di Solo, Inti**, tabata creador di bida, y debi na esaki **nan ta celebra su resurreccion aña tras aña** despues di un winter largo y friu (segun e solsticio di invierno).

Mi ta corda tempo mi tabata mucha teenager, **Richie Valens y Buddy Holly** a muri den un caida di avion cu otro artistanan. Te awe nan ta wordo considera increíblemente influencial riba nos musica moderna. Un di su exitonan grandi tabata **"La Bamba" di 1958**. **La Bamba** tabata un cancion di folklore mexicano cu **Valens a adapta cu ritmo rock y beat**. Tur aña dia 3 di februari (dia cu e avioneta a cay) ta wordo celebra na Mexico y na Merca **"E dia cu Musica a muri"** na honor di e cantante aki, **Richard Steven Valenzuela**, manera su nomber berdadero ta, tabata un cantautor mexicano americano y un pionero di rock y tata di e asina yama movimiento di **Chicano Rock**.

Buddy Holly, (Charles Hardin Holley) tambe tabata cantautor americano y un di e pioneronan di rock tambe **den decada 50** di siglo pasa. Na 1955 despues di tabata e **opening act** pa **Elvis Presley** na varios ocasion cu su grupo **"Buddy and Bob"** el a dicidi di haci musica su profesion y a toca tambe hunto cu **Bill Haley & his Comets**. El a traha cu varios productor grandi y **na 1957 su banda a logra exitonan mundial** cu **"That'll be the day"** sigui pa **"Peggy Sue"**. Artistanan y cancionnan cu tabata masha popular riba nos isla cerca teenagernan tambe e tempo ey..

Nos conoce tambe e celebracion anual spaño cu nos ta mira na television, e afamado **"Tomatina"** di Buñol na Spaña. Esaki ta e bataya mas grandi di cuminda. Mas di 30 mil hende ta bini hunto, tanto local como turistanan



pa riba plaza principal tira tomati riba otro. Esaki ta riba ultimo diaranzon di luna di augustus. Tractornan yena cu tomati cora hecho, ta dump esakinan riba caya como municion y pa 90 minuut largo e locura di tira otro cu tomati ta tuma lugar. Pa e tradicion y celebracion aki no tin splicacion.

Ta pensa cu el a cuminda na Buñol na 1944 of 1945. No ta conoci tampoco si tabata parti di celebracion di **patrono di e ciudad San Louis Bertrand**, como un forma di protesta anti religioso of djis un impulso despues cu a bolter un garoshi yena cu tomati.

Nos conoce tambe e fotonan, schetsnan, of dibuhonan y pinturanan di e tres macaconan cu ta tapa parti di nan cara y cu e texto abao: **"Mi a mira nada. Mi a tende nada, mi a bisa nada!"** Esaki ta wordo celebra na Bali y ta conoci como **dia di Nyepi** of **"Anochi di Silencio"**. Esaki ta forma di balinesnan di celebra **aña nobo lunar di Bali**, cu silencio completo.

Anochi ta haya guardianan di seguridad di Bali ta patroyando cayanan pa sigura cu hendenan ta na cas contemplando riba kico nan kier haci cu nan bida, sin distraccion di luz, radio, cuminda of papia. Turistanan ta wordo adverti pa keda den hotel **como respet**, a pesar cu nan ta permiti pa mira television, pero **cu volumen abao**. E **dia di Nyepi** ta wordo sigui pa un serie di ritual di purificacion manera exorcismo di diablonan y hacimento limpi di statuanan y bustonan den tur templo di pueblonan. Esaki ta wordo sigui pa un carnaval den cual **popchinan cu wowonan gigantesco y cu boshi di cabey** ta wordo kima pa core cu spiritonan malo.

Dia di Pan di Maishi ta wordo celebra den hopi pais ingles y riba prome di augustus cu ta wordo considera como e prome cosecha di maishi. Habitantenan ta bini hunto na misa cu un pan di maishi **di e cosecha nobo di maishi**, pa e pan wordo consagra. Antes e hendenan cu tabata huur tereno tabata entrega e maishi na propietario di terenonan. Esnan cu conoce e storia di **Romeo y Julieta di Shakespeare** por corda cu e cuidador di **Julieta, su nurse**, a menciona den e storia cu **bispo di Lamma Julieta ta cumpli 14 aña**. Tin tambe e dicho ingles **"he will pay at latter Lamma"** cu ta significa cu **"e dia ey nunca ta yega"**, esta cu e nunca lo paga bek.

Prome cu mi lubida....., tin tambe **"Dia di zwaai tur dede na bo bisiñanan"** (foto). E dia di fiesta aki kizas ta esun di mas largo di celebra riba cualquier lista di fiestanen straño. E ta wordo celebra como dia pa cuminda bo bisiñanan, no solamente cu un sonrisa pero cu un saludo di zwaai cu dedenan habri di bo mannan. Ta di spera cu nos lo no mester di un dia special pa saluda hende na un manera amistoso.

Si encaso bo lubida esaki, corda riba **dia di awe cu mi a manda e saludo na mi lectornan** y riba **dia 7 di februari** cu ta e **dia mundial di "Dia di zwaai tur dede na bo bisiñanan"**.

Juby Naar